

讀白華草堂詩初集

讀白華草堂詩集敘

黃子香鐵試禮部嘗戒詩處科舉學不自得以詩釋其
戒詩愈昌曾亮聞而笑曰士專於所好有迴萬牛入九
軍而不顧者况區區科第一得失之間哉古人好詩者
或中夜發狂大叫白晝行不見官長至以伯主之威求
改其一字不可得此非有聲無味也尋逐而好之至
甚於酒色聲利是烏知其然哉徐無鬼見魏武侯
告以相狗馬耳武侯大說也女商不知也徐無鬼曰
久矣夫莫以真人之言聲譽吾君之側也夫吾君不知
物之可好於天下者莫如也人之境百不同也境同

而性情不同則其詩合境不同而心同而才力不同則其詩隱心而呈才境不同而詩爲其徵象此古人之真也境不同人不同而詩同焉是天下人之詩非吾詩也天下人人得爲之詩而吾代爲之烏乎真人情之愛人必不如其自愛也下世爲不知誰何之人作之曰吾甚愛之愛烏乎至今昌黎之詩述家人離會燕喜之情朋友契濶賓婚相勞苦之憂忙忙計憂樂耳日所近接忠義疾苦可驚歎者亦時有物色優麗綺麗之作涉篇什亦不至於浮麗適乎境而不夸稱乎情而不歉審乎才而不剽竊漫行放乎其真適足而止此

則黃子之詩非天下人之詩也可以言真矣真如是宜
乎其能好矣稱觴賁人之堂美言洋洋錦屏高張而讀
者神不宿來也亦牧之歌商旅里巷之諺一曙得之童
至老而習之吾以是知物之可好於天下者莫如真也
物之真者吾猶好之少吾之自白者乎吾之毛髮枝節
吾猶愛之况出於吾之心腹腎腸者乎不然泛泛然天
下人之詩也吾曰爲之而不知誰爲之曰吾甚愛之僞
耶名耶惑耶道光十四年甲午七月七日上元梅曾亮
序

讀白華草堂詩集敘

作造爲也人於所聞見未經思議莫及者作曰天作造
曰天造孟子善言天曰莫之爲而爲是矣古文爲與僞
通謂爲之盡乎人也僞則不情不情無物無物而有爲
也而有言也君子謂之志奚翅乎詩童子時嘗與花
隱老人言詩詩之言承承乎天也詩之言持持有我也
不知天不可與言詩不知有我亦不可與言詩秦漢以
前兒童婦女人人能詩而不解詩之爲詩才人學士人
人讀詩而及其微引以申己意則又若人人未嘗讀詩
故詩之亡自解詩者亡之也詩亡然後強解強讀強作

意造句以自附於詩人之目者塞天下僞僞相仍紛今
裂古而又自耻其聞見之陋思議之卑以爲不若古人
之讀破萬卷迹徧天下也吾不知三百篇中鬥草之童
贈芍之女曾若所云否也鎮平穀生黃君世莫知其志
之所承與其所持而稱其能文與詩者徧海內且數十
年君顧莫測其名所自起私意竊不屑居每與人言晦
之唯恐不至今初見君宜黃黃樹齋先生席上志意如
伏虎精健如神俊濬深其息鬱黝其光席上客多抗論
橫言而君目熒熒左右注探梧接吸若留侯初遇圯上
老人疆忍從容終席不可否一語余退而詢諸他客率

曰詩人詩人靈山梁蓼圃熟君久稱君詩新意奇情有
未經人聞見思議者而偶於端木宦田處得數章翫之
則於蓼圃所稱猶多未盡君蓋非專於詩者也古來唯
不專詩詩乃神凡物情之陰變陽化人事之詘暑信寒
沙積豪分莫不暘備而後風怨雲思花機石紐忽焉有
觸則同一耳目所及而喜者見喜悲者見悲其詩之變
化詘伸亦沙積毫分於志之所窮畢肖其真而不容少
僞今讀君初集詩凡七百七十三首而不專乃神爲益
仰雖狀詩之品題高下唯專於詩者能知之猶夫人之
可用與其用之所極唯深於用人者知之余不知詩不

知詩之盡乎人者也不知詩而言詩言詩之純乎天者也君之詩有若雷聲殷殷朕有若快雨點蕉朕有若九鐘鳴霜朕有若獨鳥呼春萬花齊落朕有若忠臣烈士征夫怨女歌哭於一庭旁觀兒童婦婢爲之色喜色怒朕於乎其莫之爲而爲之者與而豈僞與不朕盡乎人者比比而余或未之見與抑於君性情有偏契而聲之洋洋善人與夫以余交君曰淺而敬異愛慕君有過尋常若是是亦天也莫之爲而爲者也非僞也道光乙未夏五九日挑鐙烏程凌堃敘畢好雨徐來時蓋嘆乾五十有餘日云

讀白華草堂詩集序

余性癖於詩無所師承而冥心探悟者十年似有得然未敢自信也嘉慶庚申秋識陽湖張琦翰風於白門張君曰吾子高才絕學而溫柔敦厚如是是必深於詩因相與爲深言出舊草二千首屬張君張君爲刪定存什一二曰後人讀之而深求其義足以達政專對已何必多余自此遂輟韻語道光乙未春因烏程凌莖厚堂識鎮平黃君香鐵於都下黃君詩名滿宇內示以刻行之九卷而屬爲序黃君詩刻行已十餘年載筆通儒欲得序其集者甚夥願以命余媿不克當也讀其詩少作已

成體勢節奏轉換緩而不弛和而不滑庶幾有德之言
壯歲漸變而道上緩仍舊而和若少遜者然新意時出
眞吾迥然見矣煮酒劇談常至中夜笙磬之同自晤張
君後閱春秋卅有六未有若吾黃君者也夫推極詩道
所致其單微幽渺可以奪造物之權變人心之度使寒
燠不能操其舒慘哀樂不能主其欣感斯固作者偶得
之而不自知讀者心領而無以言狀者也至於念衣敝
則知愛狀車聲則知敬刻嬖倖則盛陳筭紱哀疏遠則
脩掄倩盼是則體之不可不明者也或無端囂起万類
驚心或文外旁情一縷彌布或羣流迸赴而束以一峽

或一源下注而散爲衆派或崖勒奔馬或梁繞泛聲是
又勢之不可不明者也爲境萬殊用法一貫論志者感
其微言行遠者修其盡飾窮原竟委吾無以測黃君藝
之所至矣余往來吳越間久所見工詩者有吳江趙函
良甫長洲蔣志凝澹懷然皆未嘗與論其得失之故殆
於失人於今悔之異日黃君或遇二君出此相示當有
雅契且藉以補吾過也道光十有五年歲次乙未仲夏
月六日白門倦遊閣外史安吳包世臣

讀白華草堂詩集序

西江郭舍人羽可老詩人也嘗爲湘南言嶺南黃君香鐵云甲午秋君偕廉訪楊公來梁湘南知之末由見明年廉訪延湘南入署課諸公子而君已入都因從廉訪問君詩廉訪曰香鐵非第其爲詩也其爲人質直好義不事苟且行羅今古正變於胸議論不隨不激如不欲以才人見者其詩之工抑末也湘南以是益慕君之爲人思一見惟恐不獲而君已先因羽可知湘南其思湘南也一如湘南之思君是秋湘南領鄉薦出君同鄉庶子龍先生之門龍先生事竣還京君走問聞有湘南名

則喜福建張亨輔江西吳嘉賓安徽江開湖南何紹基
皆以詩古文詞名於世皆獲雋君聞則益喜揚言曰今
科得人爲最盛也蓋君之好善肫摯如此湘南抵都與
君見甚歡讀君近作共飲羽可所謂羽可曰香鐵不第
其爲人也其爲詩運才入史逐景取情樹骨杜韓之庭
關徑蘇黃之介於當代時事三致意焉而不隨不激不
事苟且一如君之爲人吾黨中一大宗也香鐵不第其
爲人也羽可曰君言信然洵爲知香鐵者雖然詩可以
觀千載後有讀其詩者仍將溯其人而曰香鐵非第其
爲詩也固始蔣湘南

讀白華草堂詩初集總目

第一卷

己巳至
甲戌

古今體詩七十九首

第二卷

乙亥至
丙子

古今體詩七十四首

第三卷

丁丑

古今體詩七十五首

第四卷

戊寅

古今體詩九十首

第五卷

己卯

古今體詩八十三首

第六卷 庚辰

古今體詩一百三十五首

第七卷 辛巳

古今體詩八十六首

第八卷 壬午

古今體詩五十二首

第九卷 補鈔

古今體詩八十五首

讀白華草堂詩初集卷之一 巳巳至甲戌

鎮平 黃釗 穀生

京口

金焦到眼佇登臨
煙裏疎鐘響易沈
客子情懷中酒放
美人消息大江深
雲泥浪跡鴻鴈爪
風露清秋鶴警心
擬向蒼厓吹鐵笛
醉歌一和水龍吟

燕子磯望金陵

廢壘空朱雀
寒沙但白鷗
蒼茫六朝盡
日夜大江流
有客來京口
看山到石頭
興亡無限意
自古帝王州

吳宮

響屧廊虛碧蘚侵春風猶憶翠華臨誰憐痛哭雙懸眼
無那含顰一捧心麋鹿臺空池沼出鷓鴣官冷舞歌沈
夕陽祇有閒花草畱作叢殘故址尋

過黃鸝坊舊宅

雛燕天桃記不清黃鸝坊畔小書生十年重問兒時路
猶有隣翁喚乳名

莫愁湖

未必無愁但莫愁白門楊柳劇殘秋莫愁粧罷臨湖望
終古無愁是石頭

早發漁溝

不待晨雞唱征夫已夙興馬蹄裹寒鐵人面裂春冰
柝警嚴霜泣鳥啼缺月升天明催早食雙眼尙瞢騰

樓桑村

樓桑車蓋童童起小兒羨作漢天子檀溪十丈的盧飛
使君却羨牧牛兒丈夫豎子成兩可髀肉之歎乃真我
惟時國賊獨有操讖語竟符當塗高東周王室同弁髦
中山帝胄但結髦南陽種桑八百樹抱膝隆中寄遐慕
龍蛇戰鬥角一時魚水君臣動三顧煮梅亭下論英雄
當年溷跡種菜傭艱難王業何時定論霸方慙五尺童

發米家莊

經旬不雨老農歎大麥將枯小麥乾馬上征塵衣上汗

午風吹過四枝蘭地名

懷臧在東庸

抗節齊顏蠋窮經漢伏生苦心攻訓詁重幣得公卿人
且疑衰病天猶忌盛名近聞長閉戶蹢躅繞階行時臧病足

盧龍九日和韻

古戍雄三輔孤城倚嶂開邊聲先雁到海色逐雲來薇
蕨荒山澗菜莢負酒杯相憐浣花客幕府重徘徊時客學使

田始通政
吳公幕

盧龍雜詠

自將肝膽問吳鉤年少何因有旅愁怕聽廬兒彈出塞
寒烟衰艸薊門秋

快馬琯弓亦健兒封侯骨相本來奇只今邊徼無烽火
虎石空傳李廣祠

灤河如帶繞城來鼓角嚴關四扇開曾見殘兵哭遼水
不堪回首望鄉臺

連天白草接龍庭山海遙分兩點青漢塞秦關歸一統

漫誇餘事說松亭

宋史劉敞事松亭卽今喜峯日

黃沙千里戰場閒蕭颯平原獵騎還日暮炊煙散城郭

紛紛殘葉下紅山

紅山在府城東北

哭伍雲兄

痛哭年時負友于眼前白草渺黃墟早聞病似垂頭鶴

邊報魂依反哺烏

兄以痛母哀毀致疾

死後新詩聽鬼唱生前綺

夢倩人扶可眞雁蕩天台去手種青松十萬株

聞計前一月夢

兄遊天台雁宕歸示余種樹詩長篇未署天馬山樵作醒後不復記憶

呈宋芷灣先生

嶺表一峯尊星辰引手捫斷鼇懸地脉孤鳳下天門元

氣雷詩卷奇懷塞酒尊鴻文沂流派萬里落昆侖

爲有青蓮筆天教入蜀遊雨雲巫峽暗鼯狖棧門秋險

道平盤馬歸裝一敝裘會須誇藥籠雪浪下金牛

又向滇黔出吟鞭緩遣歸蓬蒿仍滿徑桃李已成圍閉
戶空今古名山定是非浣花溪上老來往夢相依
不解耽吟苦還憐說士甘聞雞催起舞捫蝨向高談星
斗筵前落關河夢裏諳鄉情一何厚翦燭話天南

楊孝子詩

寒帷背風夜然燭床頭老母病索粥粥香入口病頓輕
已落孤兒一寸肉兒身有肉母所遺母甘兒肉母未知
神爪攢眉鬼號哭咄哉孝子楊家兒楊家兒年將四十
自言少賤爲人役一官已死畱孀離萬里送歸營窀穸
只如此義人已難何況至誠天可格當時母病兒在傍

醫來俱說成膏肓徘徊涕淚心徬徨三官廟前擲杯琰
願神許我母壽長神不許我兒絕望中庭無人夜拜斗
當天祝罷潛歸房霜刀一落血花濺臂肉熱處心清涼
我逢孝子遊衡湘七尺之軀真堂堂炎天烈日汗着內
袒臂尙露刀瘢創吁嗟乎鐘鳴鼎食徒爲爾眼中何人
識孝子

螻磯夫人祠

江畔靈均不可尋那堪靈澤望江濤銷魂水調蒼梧引
攬夢濤聲白帝砧聞道蜀鵲皆怨魄豈知精衛亦冤禽
寒潮落日祠門暗回首東吳恨轉深

夏雨兼旬河水暴漲感作

沿江滾滾轟濤頭鎮日淫霖尙不休捲地又防瓠子決

去歲隄決數十處

漏天重累杞人憂陂塘水滿魚苗溢田壠泥

深犢子愁慙媿杜陵思萬厦閉門徒守屋如舟

夜由鉢溪口放舟出長潭

峽仄天開閭崖尖石吐稜佛燈山鬼瞰人語怪鴉鷹樹
黑寒星閃潭昏冷霧凝前村有微火彷彿下魚簪

夜雨齋中翻閱伍雲遺稿感作

生前六尺軀身後一坏土百年且未半何以敵萬古詩
壇縱策勲事已稱小補况閱遺藁存十不得四五劒氣

出邱隴珠彩闕塵戶破麗得殘紙異寶若片羽轉恨不

愛惜散失難復聚江瑤及荔支伍雲常自誇其詩如江瑤杜鮮荔支溷以

酒肉簿遺稿多從廢簿檢出平生扶風豪勁氣張強弩有時喜風

懷好女鬥眉嫵俠士與才人兩無定去取可憐偉丈夫

末路如病虎虎死皮尙畱人朽詩肯腐燈闌不忍讀鬼

嘯秋墳雨

秋日偕諸子游九龍潭仲弟笙調叔弟琴展姓伯溫季鴻少華

長潭徑口通漁樵緣河而入半里遙山石礧礧徑偪仄

夾澗架以獨木橋昔游龍潭看瀑布十年舊徑重來鈔

山窮谿阻絕無路攀蘿捫葛援危巢同游諸子勇可賈

矯捷有若猱猿趨忽聞谷口風颭颭銀濤亂落青松梢
上有千年之棲鶻下有百歲之飢蛟飛湍一落一千丈
如玉塵散輕煙飄白龍倒挂噴玉沫神女欲下懸蛟綃
倏然迴風捲飛雪亂灑衣帽疑珠跳是時秋氣正蕭刀
江空木落啼山魈珊瑚垂實挂石壁療飢可採充寒庖
年來面目空塵土住近城市憎喧囂山水如此足不到
俗態難免猿鶴嘲深巖久坐日將落徑欲編置三重茅
歸來書齋憶清景耳畔彷彿聆笙匏

夜光木歌

癸酉夏河水驟漲村人沿隄拾竹葦得枯木攜

歸充鑿皮膜剝盡根株拳曲入夜輒有光如積
雪然余異之爲作歌

夜光木乃產自陰山斲自冰谷初疑變晝之艸出拘彌
又疑四照之花號迷穀樵蘇拾得置薪舍入夜晶光透
萌屋我思汝木上稟太陰精當其韜晦叢莽曜光厓麓
膏節晶熒枯根熠煜雷火不敢燒螭蛇不敢逐寒宵炯
炯閃驪頤幽燄森森張鬼目將竝照乘珠生煙玉珊瑚
樹十丈雲母屏九曲夜明簾照織成來水精宮伴湘娥
宿太乙仙人取之作藜杖龍宮神女刻之作華燭胡爲
漂流汨沒下長江小兒拉之當濕葦漁人燃之等枯竹

君不見柯亭之箭焦尾桐入爨猶聞老龍哭况爾萬古
積雪千年老冰結成夜光木

閼邸抄感作 詠癸酉林清之變

河北妖氛起畿南賊勢猖風聲驚草木星象動機槍此
輩魚遊釜羣公鷁在梁如何 聖明世猶未免瘡痍

不謂承平久優游養患深悚惶十行詔感泣萬方心啓

鑰鉤閣暨麾戈溷羽林重勞 宵旰慮此責果誰任

大猷士劉維少令刑尙祖之望禮小向王欽臨修皆致仕

聞說黃扉相同時乞挂冠 君恩最寬大臣道本艱難

賊據清縣命那彥成劉清楊遇春等討之

入閣參樞畫臨軒策治安連營九節度秉鉞盡登壇

三載東華客緇塵憶素衣祇因戀慈母未忍赴 皇畿

班馬嘶鳴急賓鴻信息稀所親頻問訊風雪叩柴扉

閑居雜詩

老圃經霜後人家洗甕忙摘蔬留菜甲編竹插籬槍暇
日詢鹽價多時說酒香鹽齏摻白醎滋味得新嘗

空日長潭去因過艾子橋秋林看散犢狹路避歸樵水
色揩偏淨山容瘦不彫驚心寒景晚木葉落蕭蕭

亦有田園在翻愁作計疎典衣寒士酒乞米故人書未
免羞囊澀何曾助斗儲明年應坐塾差比帶經鋤

井竈安排當幽居絕世情呼童提短綆留客設長檠籬
薄梅花凍醅香竹葉清祇應與朋舊來往訂詩盟

睡久嫌長夜天寒肺病加
方書翻本草圓夢爆燈花
蕭局溫留火殘甌冷注茶
擁衾還默坐鄰犬吹籬笆
河北初回信江南亦報書
兵戈聞未息輔畿近何如
傳檄驚風鶴封緘託鯉魚
無徒訊眠食羣醜望職除
生計當殘臘陽烏曝向檐
打頭茅屋矮刮面朔風嚴
熏鼠憎童酷偷鷄笑賊廉
此心同照覆何事察微纖

水仙

七條絃觸指泠泠湘渚餘
哀不可聽一盞寒泉薦香茗
有人供養向疎櫺

幽意惺忪絕可憐夢回清影上
屏邊思量解珮煙皋夕

酒冷燈昏一黯然

蕭齋

蕭齋琴榻趣翛然靜對瓶梅結淨緣
酒興未闌常獨酌風懷雖減不孤眠
貓頭鴨脚堪留客詩鉢花飄學坐禪
比似維摩棲斗室圖將蕉雪向寒天

和東坡歲暮三首

饋歲

丈夫論投贈惟是紵與綈婦人有餽遺
惟是榛與棗何年興饋歲來往互傭媼
筠籠繫野雞漆盒盛鱸羹半收且半璧
毋乃爲俗套腐儒雖云饑面目未枯藁
年終得

魚肉轉思菜根好苦憶鄰菴尼來餉春不老

別歲

往作詩餞春怨春畱不住春歸夏秋冬三時景長駐獨
有別歲時美人嘆遲暮有如半寸香將燼不復炷又如
逆旅人一夕遷客寓雖幸迎新春未免泣歧路白日去
堂堂掉頭不回顧誰揮魯陽戈三周華不注

守歲

道人守庚申蒲團獨打坐時人守歲窮煨殘榾柮火余
生空守株歲行若轉輾晨雞唱未繁爆竹聲已夥我欲
守此歲兒童固不可重門鰥魚閉高閣蟾蜍鎖但見伺

者愚勿笑追者跛相期醉壺樽中庭羅酒果

九日遊長潭自雙門闕入鉢溪口

同遊錦亭伯父左秋浦師張梅

初表兄

籃輦舊有約佳節况重九雙門何截業一徑盤蛇走迤
逦度石梁已到鉢溪口尋幽意未倦莽步入林阜攀藤
墮鳥巢掃葉坐石臼深林見血跡飽虎委殘狗悚然心
起畏欲坐不敢久歸途躡石磴出谷遇樵婦林香時醉
人忽忽如中酒

憑闌

棲鴉如落葉點點下寒汀煙雨催將暝蒹葭不可聽高

堂雙鬢白客館萬山青如此憑闌望秋愁那易醒

仙人橋三首

鐵索貫巖脊百丈懸當空盤旋轉腹背其下藏奔洪深
潭閤水府簾洞開幽宮穹然脫軀殼蓄此千蛟龍日光
射不及晦晝森陰風我來捫石壁山雷鳴淙淙石乳所
凝結精液如金銅不知幾千年有此骨髓融何當取昆
吾剝作青芙蓉

山靈醉顏酡帝臺觴流霞至今五色土施煜升朝赧天
風開洞門蝙蝠騰丹砂撲面覺靈氣髣髴來仙家南方
有漏天鍊石遺皇媧何不搏此土以之少補苴神仙太

忘世藥竈空搜爬求之渺難覲巖洞紛山花

緣磴攀藤蘿磴仄苔更滑蛇盤一徑行復覩真靈窟金

鐘紐不落石磨盤畧凸頗疑石敢當頂山觸成穴佛跡

不可窺仙蹤當未歇往時天馬樵

先兄伍雲號天馬山樵

來此不

着韞坐地飛千觥掃墨何突兀至今爲靈鬼精氣豈消
竭魂兮倘歸來長嘯此山月

憶舊遊

索米金門不易償空憐大隱學東方詩人硯北雙藤架

海波寺西街朱竹垞舊居

故相城南萬柳堂豪飲樂遊誇竹肉羊皮

馬骨謁侯王春明郭外垂楊影別後應添幾許長

都門

了字簾前蕩畫樵
當年小住最魂銷
門前白塔東西巷
水面紅燈上下潮
涼雨半窗方卧病
秋風幾日又攀條
莫愁湖畔空惆悵
驢背匆匆閱六朝

金陵

秋夜獨坐

窗紙覺霜侵
宵寒獨擁衾
昏燈含睡意
落葉聚秋心
掩卷轉無賴
開樽空復斟
哦詩當夜寂
壁劍忽龍吟

題家香夢

清

蒼厓鐵笛圖

天風浩浩撼崖木
老魑駭走瘦鴉哭
水底雌龍亦變聲
海天幻作無情綠
鐵笛仙人魚白衣
乘雲不共黃鶴飛
冥然獨坐海峯頂
眼看蒼涼天四圍
朱唇入破元霜凍

古愁譜出梅花弄初吹但遏月穿雲再吹已驚猿歸洞
是時衆竅號笙竽冰厓出舞天吳趨金支翠旗影飄忽
珠綃雪練光紛鋪忽然一聲山石裂萬怪須臾紛變滅
大空海闊白茫茫手捻麈尾尺八鐵方冬十月海水寒
龍愁鼉憤聲悲酸懸君此畫當素壁如向洪濤巨壑看
寄農部林詠斯先生

壬申予奉請南旋農部以詩送別并呈古琴江
先生迨予星奔抵家越一日琴江暴亡予時讀
禮家山未暇寄書距今三年矣因賦二詩奉懷
代簡

寶賦當年媿自嫌
敝車羸馬客金臺
饑驅但索侏儒米
棄置爭嗤擁腫材
豈有高名如短李
與誰佳興賞官梅
司農下直餘清暇
東閣偏憐爲我開

不堪念舊話潮州

琴江官潮
州教授

宿艸蕭蕭士一邱
嶺外青

山才鬼葬馬前紅
樹旅人愁歌從易水
難爲別笛到山陽
易感秋最是當時腸
斷句曉風殘月過
蘆溝

詠古

張釋之

謬謬賢耶故自殊
肯違漢法族無辜
上言亦自毋高論
底事君王喜謫夫

到都

側目蒼鷹竟伏誅却教孝景白無辜
雁門守到匈奴避
邊將何人似郅都

張湯

磔鼠文成老父驚是刀筆吏竟公卿
到頭對簿三長史
也被深文鍛鍊成

嵇錯

更令新除三十章削藩甌變起倉黃
可憐東市朝衣日
太子家猶說智囊

蕭嵩

衛霍功名竝絕倫
史遷佞幸比諸臣
能容長孺寬翁伯
如大將軍有幾人

公孫宏

四十傭書六十徵
起家牧豕得公卿
生平一味行恭儉
爲習春秋比晏嬰

讀五國故事

五千兵號黑雲都
忍詢三年亦丈夫
駭絕廳前閃雙眼
相煩老舅送頭顱

嫩鬢抽條向別家
打鐘槌已易穉華
淮南一片春如雪
落過楊花又李花

偏吳

念家山破曲瓏玲頭白宮人掩淚聽一片長江天水碧

羣公難保小朝廷

僞唐

魚米中江割一區蜀都殷富比吳都餅師家世雖微賤
朱五經兒敢傲無

青城進謁玉宸君宮女衣裳盡綵雲他日風塵翻舊曲
不堪重唱畫羅幃

狎客登筵醉復沈宣華苑內月斜臨重陽菊酒爭諧謔
惟有嘉王淚滿襟

朝天萬里路崎嶇曲子新聲最愴伊八尺長鞭齊馬足

青衣江上別犍爲

僞蜀

桂水梅關據一方番禺復有夜郎王洛州刺史何堪數
徒坐金根着赭黃

白銀雲母代椒塗殿壁光明蜀錦鋪府庫燔殘歸命日
尙餘四十甕珍珠

僞漢

赴海三龍破敵回巖高潮沒日相催大王騎馬何時歇
曾有山僧識去來

侍臣逃酒每行刑觴政從來斬最輕絕倒相公會不醒
歐刀枕上喚春鶯

十事忠言最慨慷鄰交全不慮錢塘江南尙有無愁主
一例封爲自在王

僞閩

題家虎巖

炳

似我非我圖

君不見東方三大一至人蛻形天地全我真又不見西
域化人空塵障以身布施無我相儒家釋家徒紛紜有
我無我何足云今吾故吾自我分如露如電亦我聞虎
巖子目短視日在行間論尺咫示我一幅圖虎賁何顏
似好我索我詩我未敢伸紙我不能人人我我如是觀
何以洞他人之肺腑又不能物物我我平等看何以藏
腹中之龍虎作詩我自用法莫笑庾生何莽鹵松石
間意濠梁想我我周旋殊媚嫵似我非我軀殼耳論我
我自有千古虎巖子趺坐聽我歌古來清風明月我惟

有登殿閣外一東沙百東坡亦皆幻影請將此旨參盤陀

閨怨篇

繡閣沈沈鎖鸚鵡香蘭含睇春煙語連朝天氣海棠陰
紫雪絲風蕩何許重籠不罩南浦魂盡欄慘碧愁黃昏
離亭碎蝶脫金粉半臂春衣帖淚痕紅棉絮薄迴嬌汗
鴉兒戲抓金鈴亂花濃柳暗闌闌迷夢殢南雲吹不散
五更油壁鳴輕雷碧雞坊東走馬迴高樓西北望天際
浮塵遮斷黃金臺

湘痕瑟瑟涼煙拖闌干十二低碧荷蓮蓬輕彈打睡鴨

海南生結罪香螺篆香已冷心香熱西望峨眉凝古雪
丹砂盆膩守宮塗綠環釵澀蟾蜍齧輕紈扇撲流螢
隔水花魂迷鬼燐蘭房星膽小如豆孤衾錦瑟長於人
幾日紅樨蒸瘴霧羅襦畫篋委殘蠹忽晴忽雨天改常
豈但郎心不如故

西墻水影陰蟲吐花犬狺狺吠東戶鰕鬚不堪犀押沈
玉宇無聲轉河鼓團團紅桂懸古香素娥捧鏡翻斷腸
愁看綠鬢變華髮碧海青天秋漏長金刀鉸斷迴文錦
一夜鴛鴦泣珊瑚枕長生淚共怨霜華二十五絃箏柱緊
孤桐半死抱紅心古調琴絲寫出九江水到鯉魚去

典却來時纏臂金

屏山雪聚行雲歇紙帳輕煙裏花骨香消篆滅寂無人
空階祇有銅仙月瑤琴不暖玉笙凍樓外哀鴻舍楚弄
鞠通夜靜撲朱絃驚醒西廊鸚鵡夢石闌古水枯金井
銀瓶欲汲愁修綆涓涓壺漏滴紅冰酒冷花迷畫霜餅
條條蠟淚融珊瑚枝心熱心灰待訴誰金盆紅獸泣幽火
骨化形銷君未知

族叔署白河縣尹補堂別駕死事詩

公名

鴉翎鷺服六品冠堂堂男子提心肝許國不必在責守
誓不兩立賊共官官本勇敢亦書生昔日諸羅方用兵

投筆渡海請長纓功成大吏上 天子畀汝監州同倅
丞白蓮教匪擾三省大帥連營隴蜀境別駕赴 闕特
上書臣昧死言臣受 國恩臣願肝腦塗 天子曰俞
汝往哉命大司馬畀汝符宣往大營參軍謨大帥喜汝
素忠義興安府有白河縣羣僚委之畏且避汝能無懼
汝其試別駕欣然領印綬生戴吾頭入虎口召募鄉勇
二三百終日搜賊萬山走官膽自粗賊膽碎遺刺設伏
日爲計亂峯巉巉高插天行數十里絕飛鳶別駕一馬
獨當先兩僕騎馬差竝肩鄉勇足戰行不前突來一人
頂碑礮衣短後衣纓曼胡拱手向前揖別駕別駕不虞

中有詐下馬驟出卅餘人箭槩如林競攢射一僕偕苑
一僕逃顛坑仆谷無低高滿山鬼哭狐狸噪天陰雨晦
山之坳三日得尸顏不變指爪透拳血糊面鬚髯張戟
怒決背生得賊頭日乃閉事聞 朝廷卹予祭廕子及
孫雲騎尉吁嗟別駕報 國恩 國恩厚汝永弗替世
人莫訝別駕起家非科目雖不科目能識字

讀白華草堂詩初集卷之二 乙亥至丙子

鎮平 黃釗 穀生

北上述懷示仲弟笙調叔弟琴展

北望浮雲動南看旅雁徂此行曾閱歷臨去轉踟躕憶
昨驅中駟爭誇赴上都慈親問歸日老父送前途荔浦
初辭粵楓江又入吳青山尋短簿白水泝長蘆遂向燕
臺息寧知駿骨殊鴻才慙賈誼歧路哭唐衢飛鞚遊邊
塞拏舟到海隅魚龍紛雜沓鸞鳳忽招呼蓮幕新辭侶
藤陰舊暢娛異鄉聯骨肉同調得朋徒正好肝腸熱無
端血淚枯麻韜奔嶺嶠苴杖落江湖隱痛如斯也重遊

敢料乎淒涼營丙舍倉卒困庚呼漫種生煙玉空憐破
霧珠蘭陔仍可採菊徑未全蕪絕意來攀柳寬心坐守
株何因談汗漫變計倏須與瑞慕原難捨人情奈善通
蒼鷹眞飽颺瘦馬顧飢驅毛義看持檄終童欲棄襦前
程占喜鵲中夜憶慈烏帆任千回轉筇應寸步扶爲歡
須兩弟釋念慰征夫

儲潭

離聲如吼阻前津畏路風波仗水神爲祝檣鳥歸反哺
不勞辛苦送行人

過十八灘

曉發贛州城秋汛漲江面行盡十八灘怒石伏不見有
如魚復浦埋伏師十萬我舟生門入疾走不與戰貪天
事倖成暗渡策亦善憶昨此經過截江駭組練天山排
劍鏑馬陵伏弩箭灘聲合四圍石路開一綫猿啼鬼亦
愁長年色沮變此行乃安然復借南風便就中大黃公
水路最習慣從容理戢楫歎忽踰雷電落日去已遙見
星行未倦微聞漏鼓聲已過萬安縣

舟行晚泊

天闊江空雁過頻適來晚飯倚船脣初升月似矜嚴女
將定風如淡宕人作苦熱行愁道路聽長干曲訊鄉親

絕憐估客能尋樂篋裏明珠盡大秦

彭蠡湖櫂歌

月光初出見南湖岸闊潮平穩睡鳬半夜鯉魚風信起
蘆花被底喚兒夫

大賈高官駕舳艫渠家忍得別羅敷笑郎終日推篷坐
恰似彭郎對小姑

小魚論桶不論斤大魚得錢纔百文賣得魚完糴米煮
飽看廬山飛白雲

湖水清清江水渾湖魚吹浪學江豚勸郎莫蹋江心浪
牢記湖頭舊水痕

大姑山

俗名
鞋山

陳王秣駟辭東阿
宓如羅韞誇淩波
文人詞賦難徵實
翩鴻想像空吟哦
我經彭蠡已三度
浮煙過眼空摩挲
匡廬作態障真面
半截雲裏湘裙拖
江心一峯浮橐駝
大姑離立當旋渦
鷗沙雁字隔洲渚
僧樓佛閣環坡陀
黃昏琵琶抱商婦
侵曉帆鼓催漁婆
風鬟霧鬢自出沒
豈愁惡浪翻蛟鼉
小姑相距百里許
如邢與尹爭雙蛾
彭郎棄汝若敝屣
偏愛小姑毋乃頗
鞢山山名等塵巖
紫袍烏帽夫如何
大姑大姑聽我歌
朝雲暮雨峯峯多
蘭旌桂旗影動摩
爾來珊珊鳴珮珂
仙人赤脚騎鯨過

采石磯頭遺一靴與爾作合吾執柯大姑一笑盤青螺

江行雜詩

十八灘前路南來第一程亂山圍客夢急峽走江聲竹
箭奔流駛蒲帆盡日行潮平天漸闊已抵吉州城
舊抱終天痛浮雲近七年今宵江上月苦憶峽中船風
雨愁灘路松楸泣墓田何時罷行役丙舍築新阡
未免匡君笑浮生等磨驢又隨彭蠡雁來食武昌魚何
日空塵債名山訪異書萬重嵐翠裏關地構精廬
天闊大江浮星河夜放舟峭帆風不借急浪月爭流客
夢初離枕鴻聲早入秋蒼茫擁衾坐遠岸數汀鷗

兒女情難道英雄事豈奢大江橫鐵槩中婦抱琵琶醉
酒風猶勁聽歌月易斜青山環幾曲曬網盡漁家
向夕銅鉦鬧船頭賽福回飯殘老鴉散燈動大魚來客
路風初冷離懷霧不開舟人邀我醉一笑玉山隤
九折怒濤奔排山勢欲吞雙蛾開地戒一鳥下天門白
晝鼉鼉湧晴空日月翻興亡慨前事設險竟空論
津吏誰能識狂生獨苦吟滔滔六朝水浩浩百年心牛
馬長江走波濤大海音關山增閱歷回首嶺雲深

發蕪湖

夢回帆鼓促揚舲煙雨攔江去不停我是行人歸未得

天涯愁望識丹亭

烏江

止馬河邊濁浪黃
烏江回首淚沾裳
紛紛功狗歸劉季
祇有烏騅死項王

一曲虞兮涕淚哀
空憐叱咤動風雷
八千子弟蟲沙盡
鬼馬仍馱鬼妾來

江東

神州割據事茫茫
天塹從來設險長
烏鵲繞枝愁魏帝
蛟龍脫鎖恨蘄王
江船有火洪波赤
戰鼓無聲落日黃
莫問鍾山今幾姓
六朝陵樹晚煙蒼

抵龍江關口阻風

風囊澎江腹激盪出奇力南船墜鐵鹿百尺深莫測昂
首若大魚欲飛不得翼雲頭吸海水勢壓半江黑天龍
露之而幻作水墨色微茫見白塔寒秀媚奇特咫尺金
陵城碣岸不可陟寒蘆作雨聲白鷺自嘿嘿江神若留
人畫本熟肖得哦詩當繪圖持向滄洲憶

謁方正學祠

竟遇鴟鵂變空嗟燕子飛九重催草詔萬死哭麻衣木
末留殘蛻祠門弔落暉溪毛無可薦悵望北山薇

謁海忠介祠

秣陵煙樹連岡隅蒼條青葉腴不枯木末亭邊訪秋碣
海公祠宇尤清疎我來振衣上階拜念公遺愛留三吳
白茆黃浦苦淤塞漕糧祿米愁征輸直中丞卽強項令
疏奏濬折民其蘇青蠅亂聲肆讒殄肥田瘦狀民謠評
是時謝病亦剴切尙條弊政陳嘉謨維公介節皇綱扶
天桃天藥同天書書生蹇謬何其愚不畏斧鑕加刑誅
平黎一策自偉略壯行幼學徵良圖心憂桑梓豈常釋
亦如經畫官南都海南萬里公故廬桃榔雨暗迷村墟
年年寒食盼家祭愁聽西風白下烏

權歌行

一壺值千金笑渠輕且浮看郎有腰纏可似壺盧不船
頭瓜蔓水船尾鯉魚風鯉魚解通信瓜蔓會纏儂

秦淮

盈盈一水擬星河午柱丁簾映綠波桃葉春煙名士漿
楊花香雪叛兒歌烏衣影落憐門巷紅鬼聲銷怨綺羅
怕向高樓聞玉笛莫愁無奈客愁何

雞鳴寺待雪

古愁鬱奇想待雪上空亭酒熱劍心赤山寒詩膽青六
朝無剩瓦一塔自搖鈴凍雀爾何意巡檐縮頸聽

冬夜卽事

讀作事堂記
鐵馬巡檐戒朔風夢回仍宿梵王宮霜鐘催曉烏頭白
佛火懸宵鬼眼紅夜果如年寒更閨心原無垢念俱空
擁衾默誦東坡偈天付吾生類轉蓬

夢伍雲兄

華表何時化鶴還尚留塵夢到人間天台雁蕩尋詩侶
合是西泠陸講山

臺城篇

鹿子開城門狗子升帳殿且至馬中間老佛親眼見老
佛見悲不見喜浮圖未成刀兵起蔬茹斷盡啖雞子荷
荷荷竟渴蜜死東堂憎見蕭老公跋兒亦自非英雄鮮

卑小兒能亢宗可憐擁衆梁湘東

金陵訪古

捨宅鍾山作道場髮憎充隱亦何妨白鹽赤米能料理
豈有移文到草堂

劫火燒殘剩佛鐙興亡難問六朝僧抱雞走犬須臾事
誰說江南事可憑

野曠天低一望寬練光亭子最高寒繁華散後鐘魚歇
砂礫沈埋舊瓦官

諸陵無主草蕭蕭寒食誰將酒榼澆剩有半山憑弔處
空場老雉挾春驕

板橋春望

幾曲青溪長板橋江南能使
春魂銷酒旗隱隱低紅檻
歌板輕輕蕩畫橈楊柳棲鴉
三尺水海棠乳燕一枝簫
御河房畔黃昏月兩岸銀鐙
照寒潮

清明書感

濕煙如縷雨如麻暗裏閒愁
逐漸加故國春光逐燕子
異鄉寒食又梨花丁年歷歷
長爲客子夜啼烏怕憶家
見說右軍曾誓墓羈人何事
滯天涯

白門

璧月瓊花倚醉看新詞艷殺
孔都官淚濕樓下鐘聲動

愁見胭脂出井闌

誰斫君王鏡裏頭
春鐙燕子八迷樓
青山一樣都無想
怪底湖名也莫愁

雞鳴埭

柳老荷荒一水隈
石城遺址沒蒿萊
雞鳴埭上寒星落
無復君王曉獵來

京邸寓吳鑒庵少宰園林六首却寄仲弟笙調叔
弟琴展

小住紅塵裏應憐水竹居
穿簾還有燕彈鋏
豈無魚城雨聲難到江湖夢
不疎日來同所事
細勘上清書

時校勘秘

三才圖會卷之三
殿珠朴石

渠寶笈

亭榭圖書富琳瑯恣意探紗幘深避蠹繭紙細眠蠶池
小客金鯽園多種玉簪不知微雨過庭樹綠煙含

攷据徵餘事吟哦侈雋才且有今軾

轍美存宮詹詎讓

古鄒枚彛器周銅局叢書漢王林清談皆博物臣本出
蒿萊

馬齒慙余長猪肝累主賢文誰為揚者醉亦復陶然過

夏談星術

淪齋精於星術

沾春費月錢頗聞居不易難得此安

便

周北張南宅重尋路不迷斜街分上下古廟隔東西

時何

仙槎師自小山先生同住
上斜街顏魯與住下斜街
舊迹畱鴻雪新巢補燕泥小
園誰作賦文館有棠梨

官燭談詩夜銀瓶索酒時
因開羊仲徑得傍馬融帷同
張季二生爲美
在宮簾門人
果羨蘋婆熟花憐菊婢遲
南鴻應見憶
秋夕此相思

雜詩

仙人擁絳節值我東海隅
許我有仙骨齒白脣復朱
飲我三危露佩我五岳圖
玉尺量我手銖衣被我軀
囑我堅道力勿以塵劫殊
引我拜衆仙投贈多靈珠
罡風海上來失脚踏泥塗
閉門日鍊丹純火回陽爐
採藥更從

師相期到蓬壺

神魚乘紫霧仙鶴翔丹霄江干一白鷺孤鳴傷寂寥
寥亦何傷顧影憐風標仰慙燕雀笑俯恥龜鰕驕一朝
去沙渚素羽何條條瓊島戲煙雨滄洲啗陵茗漁歌不
足唱高吟天上謠

美人在江渚蕙帶芙蓉裳寒蘿作帷幕製菊爲枕囊自
愛顏色好流盼生輝光昨逢貴公子贈以雙珠璫爲言
有廣廈複壁兼重廊黃金作庭柱白玉爲堵牆迷離透
綺疏曲折通璇房綢繆得長久富貴大吉昌感君垂盼
意肺附何能忘願效雙鸞鳳羞爲野鴛鴦

題顏亦樵

德貽

蓮海歸真遺照

三十三年夢覺無風花樓閣總模糊今朝拂袖歸蓬島
遺下真形五岳圖

迦葉因緣度化城飄然一笠御風行多生許免輪迴劫
合向魚山悟梵聲

送劉心香先生出都

雪鴻海鶴記前因曾是滄桑劫後身雞肋已教嘗宦味
馬蹄應悔踏香塵山中桂樹初歸客觀裏桃花再到人
手種甘棠遍南國不妨徑去醉湖濱

叱石成羊本幻觀舊游嶺嶠認郎官原知上界爲仙易

可奈人問作吏難咫尺蓬山微有雪蒼茫宦海屢生瀾
先生一笑師巢父自斫珊瑚作釣竿

哭林兀崖師

兀岸平生氣迤邐直數奇寸心傷馬骨衆口詠蛾眉禮
法門終峻文章世久知遺書歸後死手澤不勝悲

秋感

十載蹉跎事可歎敝車羸馬客長安謀生計拙求官急
賣賦人多索米難飲水自來甘建業熟梁何日醒邯鄲
浮生總被浮名誤惟有神仙斂手看

米以薪桂忍調飢誰念窮交獨贈綈人再來如嬴政客

僕求去似買臣妻功名縱屈埋頭獲文采難潛斷尾鷄
自笑天涯孤燕子春風仍覓舊巢棲

賦擬凌雲氣吐虹登場面目異冬烘軒中鶴笑貲郎貴
屋上烏疑寓主窮豪士大言逾宋玉丈夫小技薄揚雄
少年自詡驪駟筆凡馬常思一洗空

苦述虛談不朽名難除結習是生成奇文敢以儒爲戲
與義聊從鬼共爭技似棘猴真絕巧理惟木雁不能鳴
客來頗厭談繩尺我法還畱我性情

病懷嬾看廣陵濤閉戶仍將寸管操人鄙豈真緣食肉
文疵難望不吹毛書空無事常稱怪痛飲何須更讀騷

莫怨塵埃少真賞千金買骨價原高

三十年華似水流難禁中夜不牢愁肥癯骨相慙青眼
資格公卿恐白頭南北名場空逐鹿春秋家祭泣椎牛
小人有母思將母何日能爲菽水謀

長椿寺哭家敬之先生詩

寒松百丈挺孤根鐵面閻羅氣節尊一第蹉跎文學彥

半生清介考功孫

先生祖澹溪公官
吏部考功員外郎

空傳孝笋生廬墓

祇見狂鴉立寢門客邸竟難爲位哭獨來古寺與招魂

題碧血錄

二十四罪疏擊璫童昏顛倒迷奸良六君子盡入黑獄

十孩兒乃蟠朝堂刑餘專國古亦有熏天烈燄無此張
猢猻虎彪布牙爪殺人媚人何肺腸許之狠毒本尾蠍
馮乃陰噬同肉狼冠紳甘心戕同類曷怪昏極爲披猖
淋漓血肉備五毒陰霾天日無三光可憐數君碧血碧
果應六瓣黃芝黃吁嗟燕客奇男子出入狴犴能遁藏
龍尾不見隱姓氏虎口得脫疑逋亡恨不入山求劒術
取賊臣頭盛革囊人頭未落落落人臂明社頃刻成崩墻

題天水冰山錄

鈐山堂側短檠棄忠弼第前賜銀記金絲幕罩驕子眠
水精燈擁妖姬睡銅山金谷何足言萼山老奴嗔應門

文武管家數方萬萬百千億難計論山高巖巖千夫指
嘉靖家盡詎知此招寶全輸尙寶卿遺臭皆因乳臭子
春雷無聲氣鬱蒸應龍徐徐階下升一聲霹靂小兒墜
俄頃已見冰山崩用物精多亦天意待罪時年八十四
歸來負却香葉冠角巾太少蕭閒致官司造冊點紛紛
垂死方知象齒焚至尊已用扶鸞語閣老空畱召鶴文
落葉

清晨鹿跡冷蒼苔殘摺紛紛捲作堆萬點烏鴉盤陣起
四山風雨逼秋來看如老將成功退悟到高僧解脫回
刪盡繁蕪存質幹不應枯槁比寒灰

月滿空山亂打門絕無人跡有聲喧文章境已歸平淡
天地心應見本根長日著書惟學道暫時對酒亦忘言
寒龕夢覺青燈暗知在江南第幾村

水墨蕭穆老筆道盡家酷似李營邱江湖一白浮漁艇
煙月空青見寺樓倦客晚來宜望遠枯禪定後不驚秋
天公收拾林巒淨要放梅花出一頭

西風一夕促揚舲楚客離思滿洞庭千古風騷愁失墜
百年耆舊感凋零梢間鳥解翻身救窗裏人偏側耳聽
聞道陽和真有力暗中迴到樹頭青

題戲蝶圖

鳳子交飛醉綠雲冶情如夢復如薰眼前振觸消魂事
曾簇金泥上翠裙

扇影衣香四月餘南園相撲問何如鉛華洗後風懷淡
閒伴莊生著化書

滑縣令強忠烈殉難詩

千百小兒窠裏鬧妖黨演成八卦教草蛇灰線一道牽
掃帚星凸出刀鞘縣官赤手來捕蛇賊徒聚穴如妖墓
幕頓未動蛇足斷漫天毒霧全城遮吾言不用旤果烈
誰其尸者罪可礪燎原火勢不可嚮三省毗連起苞蘖
覆巢之下二卵完天眼獨碧悲臣丹赤心一寸烏境曠

紅肉千片芙蓉般風酸月苦愁雲黥貞鬼啼紅訴奇慘
忠烈家婦貞烈淑人罵賊不屈賊脅割之死最慘九十六日陰靈開忠魂披髮
天閭迴滑縣之變先有羣兒掘地作坎以蘆管吹之使
泥沙旋舞名曰窠裏鬧又有童謠云看汝鬧鬧
得過九十六日方是好漢及滑縣平果九十六日

詠懷

簞瓢勝鼎俎仁義逾膏粱節士羞苟得藜藿充飢腸不
聞丹山穴有鳥名鳳皇羽翼挾信義胸臆摘文章一鳴
聲賀世再鳴叶歸昌桐花作棲息竹實爲餽糧倘飢不
擇粒亦祇雞鷩行彼雞尙能廉儒者慎自防

雷霆擊庭柱君子亟省躬戒慎與恐懼幽獨持寸衷九

死何足畏但畏欺天公我有三寸劍性水淬成鋒豈惟
伏魑魅直以攫蛟龍洪濤排山來扁舟當其衝大風復
橫截捲浪落船篷危坐念平生微命非飄蓬

黃雲起塞上太行增暮寒念昔同征人悲歌行路難行
路亦何難所難謀一餐畏途本曲折世路尤巔岼沍陰
肅霜霰客子衣裳單誰爲綈袍贈感激中沅瀾男兒負
七尺熱血浴心肝願言奉知己盛以赤玉盤

出門亦有思所思在深閨結襦十四年季女愁斯飢暮
入勤紡績朝出攜鋤犂食貧原自甘但苦有別離柔蘭
旣生蕙弱柳亦生稊別離顧何戀老母白髮垂浮雲木

富貴無奈愚者追有母未能養乃以委荆妻輾轉不能
寐喔喔天雞啼